


# Fieskom medan dekatkan mahasiswa UTHM bersama komuniti



**BATU PAHAT** – Fiesta Kokurikulum Mahasiswa UTHM 2017 (Fieskom 2017) memberi penumpuan inisiatif menyalurkan bantuan melalui Kempen Tabung RM1-4U.

Pengarah program, Nur Hanisah Mahat berkata, penganjuran Fieskom berjaya mencapai objektifnya untuk melahirkan pelajar yang tinggi nilai kemahiran insaniahnya melalui jalinan kerjasama bersama komuniti.

“Selain itu kita juga dapat membantu pelajar menimba pengalaman baru dan menambah pengetahuan mengenai bidang di luar akademik.

“Menerusi Kempen Tabung RM1-4U itu kutipan tabung akan diserahkan kepada Yayasan Kanser Tunku Laksamana Johor (YKTLJ) untuk diberikan kepada

pesakit kanser atau pejuang-pejuang kanser bagi meringankan beban mereka,” katanya yang memaklumkan Fieskom 2017 dianjurkan oleh pelajar Kursus Kokurikulum Berkredit (KKB), Pusat Pengajian Umum dan Kokurikulum (PPUK), UTHM.

Sebanyak RM10,672 berjaya dikutip hasil sumbangan hasil Kempen RM1-4U.

Sementara itu, Dekan PPUK, Prof Dr Rosman Md Yusoff berkata, pihaknya menyokong agar Fieskom dijadikan program tahunan.

“Ia bagi mencapai misi PPUK iaitu melahirkan pelajar yang kompeten melalui pendekatan multidisiplin dan teradun, berasaskan paradigma tauhid,” katanya.

Fieskom 2017 merupakan acara tahunan warga

kokurikulum UTHM yang dianjurkan sejak 2014 dengan pengisian lebih daripada 50 program antaranya Charity Run, Concert 4Heart, Food of Medicine, TLJCF Home Charity, Khatam Al-Quran Perdana, Gerai Jualan Truck Mania dan banyak lagi.

Bertemakan 'Membina Kemandirian Pelajar Menerusi Jalinan Komuniti', turut melibatkan kerjasama komuniti luar UTHM seperti masyarakat Orang Asli Seletar Johor Bahru, Komuniti Ibu Tunggal kawasan Senggarang, Pertubuhan Anak Yatim, Komuniti Belia kawasan Pagoh, Pusat Agensi Anti Dadah Muar dan pejuang kanser kawasan Batu Pahat.

Majlis penutupan disempurnakan Ahli Lembaga Pengarah YKTLJ, Datuk Ismail Karim.

Nur Hanisah menyampaikan Tabung RM1-4U kepada Yayasan Kanser Tunku Laksamana Johor (YKTLJ) diwakili Ismail.